

**SPORAZUM
O IMPLEMENTIRANJU OBVEZA ENTITETA
IZ KONAČNE ARBITRAŽNE ODLUKE ZA BRČKO
KOJE SE ODOSE NA SNABDIJEVANJE ELEKTRIČNOM ENERGIJOM**

BRČKO, 25 RUJAN, 2001.

Vlada Brčko Distrikta Bosne i Hercegovine

Vlada Federacije Bosne i Hercegovine

Vlada Republike Srpske

Pod pokroviteljstvom zamjenika visokog predstavnika i supervizora za Brčko,
ambasadora Henrija L. Klarka

U cilju provedbe Konačne arbitražne odluke donešene od strane Međunarodnog arbitražnog tribunala za Brčko, od 05. ožujka 1999. god. i uspostave Brčko Distrikta Bosne i Hercegovine (u daljem tekstu: Brčko Distrikt) kao jedinstvene administrativne jedinice pod isključivim suverenitetom Bosne i Hercegovine;

Podržavajući integraciju, širenje i poboljšanje elektro-distributivnog sistema na teritoriji Brčko Distrikta;

Uvažavajući činjenicu da je Brčko Distrikt vlasnik cjelokupne imovine prijašnjih dijelova poduzeća za distribuiranje električne energije koja se nalaze na teritoriji Distrikta;

U cilju ravnomjernog obezbjeđivanja usluga snabdijevanja električnom energijom svih potrošača u Distriktu;

Unapređujući Memorandum o razumijevanju, od 19. rujna 2000., i Sporazume zaključene 24. listopada 2000. između entiteta i Brčko Distrikta;

Strane prihvataju sljedeće:

Predmet sporazuma:

Reguliranje međusobnih odnosa iz oblasti pravnih, ekonomskih, tehničkih i drugih značajnih pitanja, vezanih za način snabdijevanja Brčko Distrikta električnom

energijom, te razvoj prenosne i elektrodistributivne mreže na teritoriji Brčko Distrikta i bližeg okruženja.


1. Brčko Distrikt osnovat će pododjeljenje koje će se zvati Pododjeljenje za elektrodistribuciju (u daljem tekstu Pododjeljenje), koje će nuditi jedinstvene tarife i nivoe usluga svim potrošačima. To Pododjeljenje radit će pod direktnom kontrolom Vlade Brčko Distrikta do uspostavljanja nezavisne nadzorne/regulatorne agencije ili komisije.
2. Prioritet Pododjeljenja bit će bliska suradnja sa elektroprivredama RS i FBiH u cilju kreiranja efikasne tržišne strukture unutar jasnih regulatornih okvira koji podstiču konkurenciju na tržištu električne energije, privlače privatne investitore i osiguravaju ekonomski zdrav sistem.
3. Glavni investicioni zahvati u elektro-sistemu Brčko Distrikta su potrebni zbog (a) zadovoljavanja buduće potrebe za električnom energijom, (b) usklađivanja sa BiH i međunarodnim "cost-effectiveness" standardima (c) obezbjeđivanja kvalitetne usluge, (d) očuvanja integriteta sistema i (e) obezbjeđivanja potpunog povrata troškova usluga, uz razuman povrat investiranih sredstava.
4. Pododjeljenje će biti jedini distributer električne energije u Distriktu i imat će slobodu izbora dobavljača električne energije bilo iz BiH, ili inozemnog(ih) dobavljača ili kombinacije istih, i ponašat će se sukladno budućoj zakonskoj regulativi donešenoj na nivou BiH.
5. Elektroenergetski objekti za distribuiranje električne energije, odnosno do nivoa 35 KV, uključujući i nivo od 35 KV koji nisu u sastavu objekata elektroprenosa, kao i dio rezervnih dijelova, vozila, opreme i drugog materijala, potrebnih za obavljanje djelatnosti distribuiranja električne energije u Brčko Distriktu, koji *su bili* u nadležnosti "Elektrodistribucije" Tuzla i "Elektrodistribucije" Bijeljina, u nezavisnim poduzećima koja se nalaze na teritoriji Brčko Distrikta i koja su *bila* u vlasništvu JP "Elektroprivreda BiH"/Elektrodistribucija Tuzla i JMDP "Elektroprivreda RS"/ZDP Elektrodistibucija Bijeljina postali su vlasništvo Vlade Distrikta Brčko/Pododjeljenja od 1. siječnja 2001. Konkretniji detalji o dodjeli i prijenosu ovih sredstava bit će navedeni u posebnim aneksima ovog Sporazuma.
6. Pododjeljenje je, sukladno organizacionoj šemi Odjeljenja za komunalne poslove Vlade Brčko Distrikta, preuzelo radnike koji su bili zaposleni u dijelovima elektroprivreda Federacije BiH i RS na dan 31. ožujka 2000. Radnici će svoja prava ostvarivati sukladno važećoj zakonskoj regulativi Brčko Distrikta i Sporazumu o implementiranju obveza entiteta iz Konačne arbitražne odluke od 24. listopada 2000.

7. Utvrđivanje naknada i tarifa za usluge snabdijevanja električnom energijom, do uspostave regulatorne komisije, bit će isključivo pravo Vlade Brčko Distrikta. Distrikt će uspostaviti tarifne stavove koristeći proceduru za formiranje tarifa, preporučenu u studiji “Tarife električne energije i šeme socijalne zaštite” koja je urađena za potrebe Bosne i Hercegovine, a uključujući preporuke za tretiranje socijalnih slučajeva kao sastavnog dijela socijalne pomoći.
8. Isporučioc električne energije ugovorene od strane Odjeljenja za komunalne poslove Vlade Brčko Distrikta su odgovorni za kvalitet (napon i frekvenciju) isporučene električne energije i bit će obavezni da instaliraju propisno baždarenu opremu za očitavanje na svim ulaznim i izlaznim mjestima preuzimanja i predaje električne energije Pododjeljenju, sukladno pregovorima i zajedničkim nastojanjima da se omogući visoki kvalitet očitavanja svih potrebnih parametara električne energije. Uslovi isporuke, uključujući cijenu električne energije i obračun troškova na zajedničkim objektima, bit će regulirani Ugovorom o uslovima isporuke električne energije sa isporučiocima, koji će biti potpisan sa isporučiocem(ima) i biće Aneks ovog Sporazuma, a nakon provedene procedure nabavke.
9. Vlada Brčko Distrikta bit će odgovorna za odobravanje izgradnje, proširenje, razvoj, funkcioniranje i održavanje svoje elektro-distributivne mreže, kao i za odobravanje rekonstrukcije postojeće i izgradnju nove prijenosne mreže na teritoriji Brčko Distrikta.
10. Sva dugovanja za električnu energiju isporučenu potrošačima na teritoriji Distrikta do 31. ožujka 2000. godine nisu obveza Distrikta. Entiteti imaju pravo da, koristeći sva raspoloživa pravna sredstva, naplate svoja potraživanja prema potrošačima nastala do 31. ožujka 2000. Distrikt će sa svoje strane, u okviru svojih mogućnosti i u punoj koordinaciji sa entitetima, nastaviti sa naplatom tih potraživanja za račun entiteta, a sredstva koja je Distrikt već naplatio po osnovu potraživanja entiteta prema potrošačima nastala prije 1. travnja 2000. godine, bit će doznačena entitetima umanjena za proviziju koja pripada Distriktu za izvršenu uslugu. Strane su saglasne da Distrikt ovim ne garantira stopostotnu naplatu. Izmirivanje međusobnih prava i obveza entiteta i Distrikta, kao i detalji vezani za naplaćena potraživanja entiteta prema potrošačima od strane Distrikta, te dinamika, način doznačavanja tih sredstava i proviziju Distrikta, bit će regulirani posebnim Aneksom ovog Sporazuma.
11. Koncept prijenosne i elektrodistributivne mreže, koji će nastat nakon uspostave Pododjeljenja, ne smije narušiti kvalitet i sigurnost napajanja dijelova RS i Federacije BH koji su vezani neposredno ili posredno, ili će bit povezani u budućnosti, sa elektrodistributivnom i prijenosnom mrežom na području Brčko Distrikta,.
12. Svi Aneksi ovog Sporazuma, uključujući “Ekonomski uvjeti” i “Tehnički uvjeti”, koji obuhvataju detalje navedene u točkama 5, 8 i 10, kao i sve druge elemente za koje se smatra da su neophodni za poboljšavanje Sporazuma o snabdjevanju


Brčko Distrikta električnom energijom, biti će kompletirani i sprovedeni od strane potpisnika Sporazuma u roku od 30 dana po potpisivanju ovog Sporazuma.

Ovaj Sporazum i Aneksi predstavljat će cjelinu Sporazuma o snabdijevanju Brčko Distrikta električnom energijom.


Za Vladu Brčko Distrikta
Gđin Siniša Kisić, gradonačelnik Brčkog



Za Vladu Federacije Bosne i Hercegovine
Gđin Hasan Bećirović, ministar energetike, rudarstva i industrije



Za Vladu Republike Srpske
Gđin Boško Lemež, ministar energetike i rudarstva



Zamjenik šefa OHR-a Sjever
Gđin Gerhard Sontheim

